



Durante presentacion na YMCA San Nicolas

Diamars awo ta cera publico conoci cu Industry Museum

Cu lo habri den ex Watertoren na San Nicolas



“**NOS** kier ta sigur cu specialmente e comunidad di San Nicolas, pero tambe henter nos pueblo ta consciente di e proyecto aki, un museo nobo cu un contenido cu ta conta nos e historia di e industrianan cu nos isla a conoce den pasado”, asina Anky Vrolijk, director di Fundacion Museo Arubano a conta.

P’esey nan ta organisa un sesion di informacion diamars awor dia 16 di augustus 2016 for di 6:30pm pa 8:00pm na YMCA San Nicolas.

Pa por informa e habitantenan di San Nicolas di e evento, un ekipo forma pa hunta di directiva di FMA hunto cu e personal dinamico di e fundacion a sali na pia y drenta barionan di pariba di brug, pa personalmente invita e bisiñanan den e bario pa bin cera conoci mas cu e idea rond di e “Industry Museum”.

For di 5:00pm diasabra atardi e ekipo a sali di bishita y por bisa cu habitantenan a ricibi nan cu brasa habri.

Por sinti un sentido di orguyo bou di e habitantenan di San Nicolas, no solamente cu ta opta pa trece no menos cu 3 museo pariba di brug, pero tambe p’e rol cu San Nicolas mes a hunga den nos historia, pa loke ta industria riba nos isla.

Museo Industrial lo ta situa den e monumento, unda antes tabata watertoren, un edificio cu pa hopi tempo tabata cera y no acesibel pa publico.

Fundacion Museo Arubano ta trahando riba 6 diferente tema como contenido den e museo

aki, manera industria di petroleo, industria di fosfaat, industria di oro, industria di aloe, industria di turismo y por ultimo industria di sostenibilidad (green energy).

Ta programa pa organisa un evento di apertura oficial dia 12 di september y despues cuminsa ricibi bishitantenan desde dia 13 di september 2016.

Lo tin 3 empleado dinamico y bon prepara pa conta tur bishitante di nos historia industrial, di dialuna pa diabierna for di 9:00am pa 6:00pm y diasabra mita dia.

“Nos lo uza sistemanan masha moderno, specialmente cu e enfoke digital, pa ilustra tur fase di cada un di e temanan aki”, asina Anky Vrolijk a splica cu sentido di orguyo riba su cara.

Asina ta logra atrae e generacion nobo tambe pa haya mas interes riba nos pasado y rib’e industrianan cu a forma nos economia for di decadanan pasa te awe.

Por pensa p. e. den uzo di aparatonan moderno, manera ta uza den museonan grandi internacional, pa den un forma facil, laga e publico no solamente cera conoci cu nos industrianan, pero tambe pa por pasa dor di un “experiencia” cu no solamente lo conta e storia, pero tambe pa publico keda corda e storia pa despues por cont’e bek.

Di e forma aki e storia por pasa di hende pa hende, di mayor pa yiunan, di nos localnan pa nos bishitantenan y asina por sigui menciona.

Si tene cuenta cu aspectonan educativo, anto ta hopi mas facil pa corda y biba e storia ora bo ta mira cu bo wowonan kico kier ilustra, en bes di mir’e na television, lesa den buki, etc.

“Nos ta enfocando riba dos grupo specifico, cual ta nos localnan cu nos kier educa y haci nos embahador y tambe riba nos turistanan, pa di e forma aki crea e formula perfecto di entrada pa e museo por opera den forma sostenibel, y duradero”, asina Anky Vrolijk a splica.

Fundacion Museo Arubano (FMA) a cera un aliansa strategico cu Aruba Ports Authority pa nos por atrae pasaheronan di e cruceronan pa bin bishita nos museo, den un esfuerzo pa logra haya mas bishitante, pa nos conta nan e storia di nos industrianan y pa nos por conta na mes momento cu extra entrada di turistanan crucero tambe.

E estructura di Fundacion Museo Arubano ta data for di aña 1992, pero na 2015 a conoce cambianan structural cu ta haci posibel pa pone 5 museo hunto bao di un organisacion. Ta trata aki di e Museo Historico (Fort Zoutman, Oranjestad), Museo Arkeologico (Ecure Complex, Oranjestad), Museo di Comunidad (Nicolas Store, San Nicolas), Museo Industrial (Watertoren, San Nicolas) y Museo di Carnaval (San Nicolas).

Museo di Comunidad y Museo Industrial ta programa pa habri na aña 2016 y Museo di Carnaval lo habri na 2017.